



Ronaldo indang'armband'
dollar 75,000 agi ayok

NK den yimjung yanglutsü atema
China-i shilem agitsü imlar: Chung



VOL. XVIII NO. 169 (ADOK 169) DIMAPUR

AMUNGNÜ (SUNDAY)

RONGCHII (APRIL) 04, 2021

₹ 5.00

H Chuba Chang den tetokteper shingamelii takok nguogo



H Chuba Chang

Kohima, April 3 (TYO): People's Democratic Alliance (PDA) consensus candidate H Chuba Chang-i Noksen by-election nung tetokteper shinga melii takok nguogo.

H Chuba Chang ya taoba mapang kümsük pezüben tashi MLA ka lir aser pai Tuensang district kübok 51-Noksen Assembly constituency by-election nung tokteptsü atema tenüing agüja liasü.

H Chuba Chang-i Nationalist Democratic Progressive Party (NDPP) ticket amer election nung tokteptsü atema tenüing agütsü.

Ajisüaka, April 17 nü agitsü by-election atema tenüing agütsür pa dang liasü. Iba jagi election ketdangsürtemi tanü pa den tetokteper shinga melii takok anguba osang Nagaland nung Deputy Chief Electoral Officer, Awa Lorin-i metetdaksü.

Taoba Minister C M Chang asüba sülen iba Assembly menden tazüing aküm, ta Awa Lorin-i Election Commission of India (ECI) dangi shidi züluba nung shia lir.

H Chuba Chang-i takok anguba sülen Nagaland Legislative Assembly nung NDPP MLA 21 kümogo.

NDPP-i aniba PDA telokteper nung BJP MLA 12 aser Independent MLA ana dena lir.

Külen, züngsem 60 agi akümiba state assembly nung opposition Naga People's Front (NPF) MLA 25 lir.

ECI-i PM Narendra Modi nok-tangtsüla : Assam Congress

Guwahati, April 3 (Agencies): Assam Assembly election shilem tasembuba agitsü anogo 2 dang lia Congress-i Election Commission of India (ECI) dang Prime Minister Narendra Modi-a election atema nüboyimba mapa meinyaktsü atema tenokdangba agüjang ta takhangba agütsüogo.

ECI-i Assam Minister aser BJP lemmir Himanta Biswa Sarma ghonda 48 atema tenokdangba agütsüba sülen Congress-i iba olen jembiogo.

Ajisüaka, Sarma-i ECI dang tatok meshiba sülen ghonda 48 nungi 24 ajemtsüogo.

"Assam nung election tiptema agitsü atema ECI-i PM Narendra Modi, Amit Shah aser JP Nadda nungera noktangtsüla" ta Congress lemmir Randeep Singh Surjewala-i ashi.

"BJP-i election nung tamakok nguogo aser iba jagi ozüingi memelaba mapa inyaker. Election tiptema agitsü atema ECI-i Narendra Modi, Amit Shah, Sarbananda Sonowal aser JP Nadda nungera noktangtsüla" ta Surjewala-i metetdaksü.

Assam nung BJP candidate ka indang gari nungi auyba EVMs anguba atema ECI-i bushisüngdang asütsüla, ta paisa ashi.

Honibarnü Assam Congress-i Guwahati nung aliba Manabendra Sarma Complex

jakdang BJP lemmir Pijush Hazarika-i journalist ana amokmerenba anema lungkak aitogo.

Assam Congress-i Assam Assembly election nung Pijush Hazarika indang candidature agienang ta takhangba agütsü.

April 1 nü Assam Minister aser Jagiroad MLA Pijush Hazarika-i Assamese news channel nung journalist ana amokmerena liasü.

Assam Congress-isa tanü Election Commission dang EVM auyaba aser strong room kati taittsü aketba nisungtem aiba indang ken o benokogo.

Assam Congress President Ripun Bora-i Assam Chief Electoral Officer (CEO) - Nitin Khade dang item ken o tem bushisüngdangtsü aser aibelenertem merenshitsü atema shidi ka zülüogo.

Gari balala nung anguba Electronic Voting Machines (EVMs) ji election nung amshitsü atema shimtetba garitem masü, ta Assam Congress-i ashi.

Külen, Dibrugarh nung aliba strong room ka nung temolung melemba nisung kar senzüba angu aser iba atema onoki returning officer tsüngdang ken o ka benokogo, ta Assam Congress-isa State Election Commission dang shidi nung shiogo.

Lamhainamdi ken o dak sendakba nung nisung 4 puogo

Dimapur, April 3 (TYO): March 22, 2021 nü Lamhainamdi yim nung nisung asem tepsetba ken o dak sendakba nung Special Investigation Team (SIT)-i nisung pezü puogo.

March 30, 2021 nü DIG-i aniba SIT ajanga nisung pezü apu. Parnokji 1) Zheshito Swu, GB Kiyevi Village, 2) Ghosheto Swu, VDB Secretary, Kiyevi Village, 3) Vikaho Kappo, Kiyevi Village aser 4) Lovito Swu, Diphuphar nungertem lir.

March 22 nü Lamhainamdi yimtsüing nung nisung asem tepsetba dak sendakba nung March 23 nü State Crime

Police Station (SCPS) nung mejangjaba nisungtem anema ken o ka benok, ta SP (Crime) & PRO, PHQ-i ashi.

Iba ken o bushisüngdangtsü atema DIG ka lenisüba kübok Special Investigation Team ka tentet. SIT-i March 24 nü lendong atalokba tesem semdang, ta SP (Crime) & PRO, PHQ-isa metetdaksü.

SIT-i lendong atalokba tesem reprang aser ashishitep aketba tesem nung mapa lemkükba police tem dang nungi kulitem benden. March 25 nü SIT, DEF, STF aser special branch personnel-i iba tesem aser meketa aliba yimtsüingtem nung mita ao.

Iba mapang parnoki iba ken o dak sendakba kulitem aser prangpong balala indang injang tazüing aser taittem bendena liasü.

SIT-i apuba nisung pezüji police ket nung yua lir aser bushisüngdanga arudang kuli aika ngutetigo. Tarutsü anogotem ano nisung aika aputsü akok, ta SP (Crime) & PRO, PHQ-isa metetdaksüogo.

Iba ken o dak sendakba nung tanga osang tangbo temai adoka mashir kechiyong iba ajanga bushisüngdang nung tetsükdaksü ajurutsü akok saka SIT-i tembanga bushitsü tamang akar, ta paisa ashi.

ULFA (I)-i Quippo mapa inyaker ka chiokogo

Tinsukia, April 3 (Agencies): Honibarnü United Liberation Front of Asom (Independent)-ULFA (I)-i Quippo Oil and Gas Infrastructure Limited nung mapa inyaker ka chiokogo.

December 21, 2020 nü ULFA (I)-i Quippo Oil and Gas Infrastructure Limited nung mapa inyaker nisung 2 pur aoba sülen anogo 100 tema lir tanü ka chiokogo.

Osang angazükba agi, Honibarnü anüingdang 12:30 ako meta ULFA-I-i arishi küm 51 tain Pranab Kumar Gogoi chiok.

Arunachal Pradesh kübok Changlang district nung Longvi yim anasa Gogoi chiok.

Gogoi ya Assam kübok Sivasagar district nungi lir aser pa ya Quippo nung drilling superintendent ka ama inyaka liasü.

ULFA-I-i pa den külemi radio operator Ram Kumar pur ao. Kumar ya Bihar nunger lir aser tena ya Changlang kübok Quippo rig nungi pur ao.

"Arunachal police telok ka

min telungi ai aser Pranab Kumar Gogoi kümzük. Onoki pa dang asüngdangya südar" ta Changlang nung Superintendent of Police, Mihin Gambo-i osangbener dang ashi.

Ajisüaka, iba osang zülü tashi nung Arunachal Police-i Ram Kumar kong lir'ar memetet.

Tena pur aoba telungpurtemi tena tesem balala nung chioktsü ta osang tejangja sangoktsüogo ta ketdangsür kati ashi.

Ajisüaka, Quippo ketdangsür katibo Ram Kumar jia tanü chioktsü aser pa len tom nung lir ta metetdaksüogo.

Quippo ya Delhi nung amenoka aliba oil drilling company ka lir aser Northeast nung parnok indang oil rigs 3 lir.

India tsütsü border pillar number 172 anasa Longvi nung telungpurtemi nisung ka chiok ta intelligence osang ajanga ashi.

"ULFA (I) aser Quippo tongti ketdangsürtem tsüngda olemtepa aruba sülen Gogoi

chiokogo. April 1 nü tena chioktsü atema sen meshiba agütsüogo" ta ketdangsürisa ashi.

ULFA-I-i tena chioktsü atema Quippo dang Rs 20 crores meshi. Ajisüaka, sen kwi agütsü'ar tang tashi osang temai madok lir.

Gogoi aser Kumar na pur aoba sülen jembishinüa arudang, mapang kabo ULFA (I)-i tenaproing tepsettsü ta osang metetdakja liasü.

Külen, Honibarnü Assam Rifles-i sangdong ka agütsüba nungbo "April 3, 2021 nü South Arunachal Pradesh nung Assam Rifles indang border patrol telok kati India-Myanmar arrtsü adena arur nisung ka apu" ta ashir.

"Iba nisungji Pranab Kumar Gogoi ta jangjaogo aser pa ya Quippo Oil and Gas Infra Ltd nung mapa inyaker ka lir. Pa ya Dec 21, 2021 nü ULFA(I)-i pur ao. Pa Arunachal Pradesh kübukk Longvi nung Arunachal Pradesh Police ket nung agütsüogo" ta Assam Rifles-isa metetdaksüogo.

COVID-19 Nagaland: Nisung ka dak putet; 133 anepaludar

Kohima, April 3 (TYO): Honibarnü Nagaland nung nisung ka dak COVID-19 aliba putetogo aser iba nisung züngsema ajak agi 12,362 kümogo.

"Taniü Tuensang nung nisung ka dak COVID-19 putetogo" ta Health & Family Welfare Minister, S Pangnyu Phom-i ashi.

Nisung 12,362 rongnungi 11,980 taneptsü nguogo aser

tang parnok 133 anepaludar, ta pai metetdaksü.

Nagaland nung COVID-19 nungi taneptsü angur 96.90% lir, ta Health & Family Welfare Department Director, Dr Denis Hangsing-ia ashi.

Good Friday nü nisung 16 dak COVID-19 aliba puteta liasü. Parnokji Kohima nung 13 aser Dimapur nung 3 lir, ta paisa ashi.

Nagaland nung COVID-19

puteta alir nisung 91 süogo saka parnok 10 bo tanga timtem ajanga asü. Külen, nisung 158 tashi tanga state temi ogo, ta Dr Hangsing-isa metetdaksü.

"Nagaland nung COVID-19 alitsü akok ta temolung melemba sample 1,36,843 tendangogo. RT-PCR ajanga sample 75,532, TrueNat ajanga 37,537 aser Rapid Antigen Test ajanga 23,774 tendang" ta paisa ashi.

Kisama nung Aoleang Monyu benjung mungogo



Dimapur, Rongchii/April 3 (TYO): Konyak Union Kohima (KUK)-i ayongzüka April 3 nü at Naga Heritage Village, Kisama nung Aoleang Monyu benjung mungogo. Iba sentong nung Advisor for Fire & Emergency Service, SIRD and Relief and Rehabilitation, Pohwang Konyak alakteta jaoker liasü.

Sentong nung o jembiba

mapang Pohwang-i, Aoleang Monyu benjung ya Konyak nungertem atema benjungtem rongnung tongtibangtiba lir, koba küm shia April 1 nü nungi tenzüka anogo trok amunger, ta ashi. Paisa, Aoleang benjung ya temoatsü meshizüka amungba aser küm tejenba tembangba aser tasenba agizükba benjung ka lir, ta ashi. Iba sentong nung lokti pelaa

agizükba o Konyak Union Kohima tir Dr. W. Phola-i jembiba aser Aoleang Monyu benjung indang teratet State Chaplain, Rev.T.W.Yamyap-i lemsatop.

Sentong nungsa Longchang Unit, Tobu Unit, Aboi Unit, Chen Unit, Wakching Unit aser Mon circle-i sobaliba tsünsang saya aser iba sülen lokti benjung chiyongtepa liasü.

DY.CM,NPP-i aser NPCC-i Easter salem lemastep

Dimapur, Rongchii/April 3 (TYO): Dy. CMO Media Cell sandong ka ajanga state BJP legislator tem tenüng nung Dy. CM aser BLP lenir Y. Patton-i state nung aliba nüburtem den Easter salem lemsatepba metetdaksüogo.

Yisu Khrista tasü nungi shia aruba sentsüwangshidaksütsü atema Easter Sunday ya alima ajunga nung amunger, aser iba ajanga tamangertem nem timla agütsür. Yisu Khrista-i kanga ajemalua nüburtem tenzüka pa taküm liogo aser temeim sayuba den liteta sayuogo.

Taküm Easter anogo amungba mapang asenok ajaki temeim, yimjung yimyatem angazüka benshitsü merangdi aser Yisu Khrist temeim agi asenok ajak dak kongshia, ta Dy. CM-i lemsatepba kasa sangdong ajanga metetdaksü.

Maneni NPP Nagaland tenüng nung tir Dr. Andrew Aphoto Sema-i Easter tepela salem lemsatepogo.

Yisu Khrista tasü nungi shia aruba anogo National People's Party (NPP)-i nüburtem ajak anema aser tepela nung talubusa alitsü imlatsür. Easter ya taküm tasen, leprongki tamang tia nunga timla anguba, tamang agi tasüba koktetba temaitsü lir. Iba anogo yagi Tsüngrem temeim aser taochi indang asenok nem lephsia metetdaksü, kechiyong pa tasü nungi shia arua taküm aküm. Nagaland nung aliba nüburtema temenen, tesempatep aser tsükchitep yimya melechia, tenüng agi dang Khristan masü saka mapa agi inyaka sayuba Khristan kaka akümtsü merangdi, ta pai ayongzü.

Taküm Easter amungba ajanga asenok tanüla pa mesükba nung asünsangshiti aser asenok temulung temeim agi sünga kümdaksüdi, ajita asünungdang pai yangluba nüburtem ajak dang mebendangi temeim sayutettsü

aser asen lokti yimjung aser tesunep nung alitsü atema inyaktettsü, ta Dr. Andrew-i ashi.

Maneni NPCC tir K. Therie-i NPCC tenüng nung Nagaland nung aliba nüburtem ajak den Easter salem lemsatepogo.

Pa temeim asenok asoshi ulura, asen dang Pai tai adok aser Pa chir Yisu Khrista ajanga kangkitong nung asen menen khuret abenba. Asenok ajaki tai adoktsü aser temeim sayutsü angazükti, ta pai ashi.

Asenok ama menenpurtem kümzüksü atema timtem tekangshi ajanger iba Easter Deobar anogo Yisu tasü nungi shia arur asünung, kotaker yimla ajangzüka teti tatem maka jangradema alitsü atema ajaki angati tekümtet agitsü imlaja atar, ta Therie-isa shisem.

Easter amungba ajanga maneni tamangertem ajak taküm nung Khrista ngudaksütsü imlaba pai lemsatep.

KOCC-i merekmeju sentong ayongzüka agi



KOCC team aser merekmeju sentong nung shilem agirtem tangokba noksa nung angur.

Kohima, Rongchii/April 3 (TYO): Keep Our City Clean (KOCC) team-i ayongzüka merekmeju sentong tanü Kohima jila nung Razhu point nungi Phoolbari tashi agiogo.

Iba merekmeju sentong nung Hindu community, Bright

Morning Star Children Home, KOCC volunteers aser temulungertemi shilem agia liasü.

Merekmejuba sentong nung shilem agirtem nem Pawan-i (Asiatic Hardware store, Kohima kibur) süngojemtsü agüja liasü.

Kasa mapang nung KOCC convenor Khriehuzo Lohe-i, taruba merekmeju sentong SP Point nungi Big Bite tashi agitsü, kong Capital College kaketshirtem aser tanga volunteer temi shilem agitsü, ta metetdaksü.

Dimapur nung temesepba mozü apu

Dimapur, Rongchii/April 3 (TYO): Dimapur temeket nung temesepba mozü ayokba osang angazükba sülen Excise Narcotic cell personnel temi March 31 nü tesem ka meita aoba mapang Hozuxu Kinimi'er jala Eliho Kinimi (40 yrs) ket nung Heroin (Sunflower) gram 13 apu.

Aija alila ya NDPS Act 1985 kübok section tapet dak ajemdaker pua lir aser la ket nungi apuba temesepba mozü ya Excise Malkhana nung yua lir, koba Destruction Board-i raksa intoktsütsü, ta DY Commissioner of Excise (NC) S.Chanlei Angh-i sangdong ka ajanga metetdaksü.

Phek police-i nisung ana apu



Kohima, Rongchii/April 3 (TYO): Phek district nung telecom operator tem nem optical fiber connecting agütsüba company Mukand Systems and Networking Pvt Ltd indang cables tem auyar ana Phek District police-i Chozuba jila anasa puogo. Tena ya ka March 28 aser ka 29 nü apu.

Aija alisang ana ya Theputo Nyekha (38) aser Sato Lohe

(40) ta jangjaogo, aser tenaprongla Suthozu new village nungi lir.

Cable auyar aobatem tena ket nung lia ngutet.

Damage to Public Property Act 1984 Sec 3 kübok tena anema ken o benokogo.

Phek SP-i, auyaba oset agizüker aser alizükertem IPC kübok section tapet dak ajemdaker merenshitsü ta tekümdangtsü metetdaksüogo.

SDPDB Pughoboto Board senden den plantation drive ayonger

Dimapur, Rongchii/April 3 (TYO): Additional Deputy Commissioner & vice chairman, SDPDB Pughoboto, Thungchanbemo Tungoe-i sangdong ka ajanga, Sub-Divisional Planning & Development Board senden den plantation drive sentong April 7 nü agitsü sentong yanglur aliba metetdaksüogo.

Paisa, HoDs/head in charge ajak dang plantation drive atema staff asemsem yoktsü mepeshia metetdaksüogo. SDPDB züngsem aser staff tem ajak Mishilimi yimtsüng among nung anepdang 8:00 ako nung ajuruteptsü. Maneni züngsem ajak dang senden den plantation drive sentong nung jangrabangra shilem agitsü asoshi kasa sangdong ajanga metetdaksüogo.

Nagaland mega entertainment-i physique round ayonga agi

Dimapur, Rongchii/April 3 (TYO): Nagaland mega entertainment-i ayongzüka April 3 nü Ciekhan fitness, Kezekei Kohima nung physique round agiogo. Iba tetoktepba ya Thejakhrietuo Kire, Ape Puro aser Neisa Rupreo nungeri tendanga liasü. Physique round atema Ciekhan fitness kibur Hukupa mentor liasü.

Iba tetoktepba grand finale April 24 nü RCEMPA, Jotsoma, Kohima nung agitsü. Nagaland mega entertainment tir Samuel Achy Phom-i sangdong ka ajanga, finalist tem Mr & Miss Nagaland mega model hunt season-1 atema tokteptsü aser takok angurtem Mr & Miss India globe aser northeast nung indang indanga tokteptsü asoshi maongka angutsü. Maneni takok angurtem taruba 2021 hornbill festival tourism magazine nunga adoktsü, ta metetdaksü.

Piles Anepaluba - Kabiraj dang alakteta pelaba metetdaksür.
Piles, Fistullah, Gastric, Sinus aser Tonsil-Ajma agi ni kangshia
liasü aser Rectum nungi azü alu dang mapang talangka item
timtem nungi junga taneptsü mang. Ajisüaka, tang **Kabiraj H.
Umar Chesam** contact no. **9362359056 / 7627998690**
Address: Burma Camp Police point opp. tetuyuba nung anidaka surgery
kecha magii (non-surgical) anepalur anogo ishika tsüngda ni taneptsü ngua
liasü aser iba sülen tanü tashi kü temang nung timtem kecha mali.
Time: 9 AM - 5 PM -Yours sincerely - Limatoshi, Add: Mokokchung 9862142459


tendangsü atema forensic lab & veterinary laboratory-i yoktsü tetuyuba agütsüogo.

Arunachal Pradesh chief minister Pema Khandu-i Itanagar nung IPS probationers of 2018 & 2019 batch den ajurutepa sensaksemdang agiba noksa angur. Iba mapang Arunachal Pradesh home minister Bamang Felix, advisor to home Nyamar Karbak, state director general of police (DGP) RP Upadhyaya aser tanga ketdangsürtemi CM Khandu meina ao.

"Onoki police aser election ketdangsürtem dang onok indang taa tutsütsü mepishi saka parnoki election tanabuba shilem nung anogo pezünü atema Rs 900 mesüra Rs 1,000 agütsütsü ta ashi. Kodaser Rs 900 mesüra Rs 1,000 agi onoki anogo asem-pezü ketdangsü aotsü?" ta Home Guard personnel kati asüngdang.

"BJP candidate ajaki ozüngi memelaba mapa inyaker. Nübortem onok den dena lir, BJP shisabulur" ta Assam Congresslennir aser taoba Lok Sabha MP Sushmita Dev-ia ashi.

"Assam (upper Assam) nung election mezüngbuba shilem nung parnoki Rs 5,100 angu aser tanünga Rs 9,000 ji shilem tanabuba aser tasembuba agiba sülen agütsütsüba liasü. Ajisüaka, parnoki mezüngbuba shilem ama sen aginür" ta



Sarma-i BPF lennir Hagrama
Mohilary anema o jembiba atema
Election Commission-i pa noktang.

nung assistant wildlife warden
Sangam Baidya-i anir forest
ketdangsür kari mita aodang
Akash Tripura apu aser pa ket
nung sü teküp den shi angu.
Rajnagar nung aliba Trishna
Wildlife sanctuary nung sü aika
lir.

Forest staff teyari medeni
Wildlife Sanctuary ka telung nung
shikaritsü makok ta iba tesem
nung alirtemibo ashir.

"Iba inyakyim nung forest staff
dena aliba kuli sayur aser iba jagi
shirurutemi timtem ajurur" ta iba
tesem nung alir kati ashi.



TIR YIMYIM YIMOBILEM (EDITORIAL)

DIMAPUR AMUNGNÜ, RONGCHII (APRIL) 04, 2021

KULISÜTSÜ TANGO APUOKTSÜBA

Alima nung nisung taküm otsü ajak tasoba nungi tenzüker aser tasüba nung atemer. Ajisüaka, Yisu Khrista otsübo masodang nungi tenzüker aser Pa asüba nung matemer saka sür külenang shitakba Pa otsü aser mapajibo tenzüker. Alima nung tsüngrem tapu balala külemertem o asenok Yisu Khristaji dang kibur aser kümtetdakba ta amangertem na tetsüngdaji ibaji lir. Ibaji dang masü saka alima anung alirtemi amangba tanga tsüngremtem o Tsüngrem chir Yisu Khrista ta tetsüngdaji nisung ama asü saka shia arur Pa kotaki tanaben meyipa matudang, Pa nütsüngtem ajurua parnok nem tenyaba mapa nungloktsüba lir. Aji oda, Yisu sür shia maru asübo Peter-i anir Yisu Khristaji pa taküm nung kibur ta menangzüktetba purtem ajak Yisu majurudang inyaka aliba alima mapatem to agi meyiper lila. Ajisüaka, Yisu shia aruba sülenang, parnok nütsüngtem kar ango pua alidang aser kar alimelen sarua alidang, Pai parnok nisung pur asütsü jajetba shitakba mapa to tenzüker. Iba jagi kodang asenoki Laishiba nung Yisu shia aruba indang azünger, Yisu shia arur külen Pai nütsüngtem dang parnok tenük agi anguba indang nisungtem dangi orr shiang, "kechiyong kechi koda tebei ni yok, yamaji nia nenok yoker," ta Yohan 20:21 nung shia angur. Aji oda, Yisu shia arur, Pai Pasasa tanüla nung dang masü saka shi nung dena adoka Pa nütsüngtem ajuru aser Toma nembo Pai pa teka aser tesa tarak nung kongshidaksü. Joko, nütsüngtem ajaki angu aser amang nungji, parnoki angubaji orr nisungtem rongnung kuli asütsü nungloktsüba agi parnokji Pa shia aruba kuliser kaka aküm. Tanü Yisu shia aruba anogo, Easter anogo yagi, asenoka Pa shia aruba nung amangertem süra, asenok danga oang aser Yisu asenok menen asoshi asü aser Pa shia aruogo, anungji Pa dak amangertembo kodanga masütsü saka teti taküm angutsü ta kuli süang ta ashir. Atangji, ano tanaben Pa asenok anir arutsü indanga kuli asütsüba asenok nem nunglokja lir. Iba jagi Yisu dak amangertem ajak ya kuliser kaka kümdaksür. Tetezü, Yisu shia aruogo aser Pa ano tanaben asenok anii arutsü, anungji teti tekümtet angutsü asoshi Pa dak amangang ta tangar dang kuli asütsüba pastorba aser missionaryba mapa kija masü. Mesüra Yisu asenok menen asoshi asü aser shia aruogo ta kuli asütsüba theology azüngertem kisung mapa masü, aji Yisu dak amanger Khristan shia mapa lir. Easter anogo nung Yisui asenok dang, Pa dak repringang aser pei tenük agi kechi angu aji orr kuli süang ta ashir. Atangji, tanü asenokibo nütsüngtemi Yisu shia aruli, Pa leper tazung aser Pa taküm anguba amaji shi temang aser leperjibo mangutsü saka asenok asoshi Laishiba yuja lir. Iba mapa ya angatetdaksütsü atema, Yisu alima nung taküm alidang, pai takarsang o Lazar na o entepba otsü nung, takarsangi molumi nungi Abraham dang par adianutem dang kotak aser molumi indang ashitsü atema Lazar-ji khen alimai yokang ta ashidang to, Abraham-i takarsang dang alima nung parnok asoshi Mosa aser ainkertem Laishiba tokja lir ta ashiba asenoki Luke 16 nung angur. Tetezü, asenoki Yisui asen kibur aser kümtetdakba ta amanga Pa asüba, Pa shia aruba aser Pa tanaben arutsü indang kuli asütsüba asenoki tama angutsüla, metettsüla aser angatettsüla aser item ajakji Laishiba nung shia lir. Aji oda, Laishiba mezüangi aser mangateti asenoki Yisui Tsüngrem chir ta kuli asütsü makoktsü. Tanü asenok rongnung aikati Laishiba mazung aser mangatet ser Yisu indang kuliser ama inyaker. Iba jagi asenok tenla ki, asenok taküm aser kibong nung kulisüba mapa agi jangramatemer. Laishiba junga mazung, memetet aser mangatet ser Tsüngrem o jembibaji medical science memetet ser medical doctor jilu abener amai lir. Yisu shia aruba jagi asen aibelen ajak amadokdaksür aser ajemajema melii Tsüngrem temeim indang kuliser kümdaksür. Ashi, Yisu shia arur nütsüngtem alidaki arudang, tamasa Pai peter arütsüla mesüra maksüa menütsüla aser Toma danga mamangra na takoksa ta dang shir yutsüla. Ajisüaka, Yisui Peter aser nütsüngtem mulungjang nung tejashi, tetsüba aser tesasa shisatsü alibatemi meteta, temeim agi parnok tai aser tamakoktem tobo kecha metetshi saka nenok mulung anisüngzükan aser sünepadokang ta ashiba asenoki Laishiba nung angur. Atangji, Yisu indang kuliser akümtsüba anguba aser metetba kisung agibo Peter amaji timtem lendong mapangbo menangzüktettsü. Iba jagiang, Yisu shia arur külen Pa nütsüngtem Pa kulisüba mapa tasü itta inyaktettsü asoshi Pai tanüla temeshi apuloktsüba asenoki Yohan 20:22 nung angur. Iba tangoji melira asenok temang ya ajungli ka dang akümtsü. Kasaji iba Tsüngrem tangoji medeniang asenoki Yisu Khrista indang kuli mesütettsü. Iba tangoji asenok nema apulokjang ta tanü Easter anogo nung Yisu dang shidi.

OLEMSABANG

Clean Election: Yamai inyak nung Jungdisü?

~ Dr. Bendang Longkümer, Artang (Osang zülur)

Yanglushidi Sensaksem Sabang 2021 nungi ita nung ken mesüra anaben Zoom meeting ajanga shisatokden kaa arur. Iba YSS ajanga aortem, arogotem, laishirtem aika tajangzük tulu ngua arudagi. Iba sabang ya shisa lemsatepba, lokti jenjang tajungba akümdaksütsü, alima/ lokti yanglushitsü asoshi khuret abenba sabang ka lir. Yangi takoket lenirtemi anir shisatsü aser sarasadem khuret lemsatepa mapa kuma takok angutsü lemantem sayutepa teyanglushitsü ajungshiteper.

"Yanglushidi Sensaksem Sabang" onük "Clean Election: Yamai inyak nung Jungdisü?" ta asüba onük nung ajemdaker 26th March 2021 6:00 P.M nungi tenzüka shisalen tesayur Rev. Dr. N. Tzüdir, Mobalizer, International Mission Mobilisation, Nagaland, India aser Mr. Subonenba Longkümer, Director and Chairman, Community Educational Centre Society, Nagaland, India tenati jembiba nungi olongtem agiteta yamai lemsateper.

Mr. Subo Longkumer-i pa o tenzüka clean election Campaign maparen ya Langpangkong Kaketshir Mungdang (LKM) dak amendaker tenzüker nung LKM inyakyim aser inyaka aruba, anguba, ajangshiba, tatalokba nungi yamai inyak nung jungdisü ta tebilemba lemsatep. Naga lima nung Clean Election atema LKM-i social media balala nung yim-yim ayimba ajanga Clean Election Campaign tenzüka ao ta shisem. Taoba Election mapang Clean Election Campaign maparen inyak aruba nung takok anguba tasatem kar lemsatepba rongnung shisemba kar: Yimtsüng ajak nung arogo aser yimden yimsüsür den mensem tajung amenba, yimtsüng ajak nung clean Election Action committee kaka tentettsüba, town ana (Changtongya aser Tuli Town) nung lokti senden agiba (open air mass campaign), item maparen inyakba nung takok anguba aser yamaji nüburtem nungi telangzüba tajung ngua Clean Election yimyim nütsüng nübur ajaki junger ta agizük. Election mapang Youth camp mesemba anen aser iba ajanga rongrong kanga ajema akümba aser akhi ama masü yimjung nung Election agitetba, pei sasa pei temeden vote agütsütetba nüburtem asoshi tepela tulu liasü. Ibaji dang masü pei mulungba party aser candidate nem vote agütsütetba temeten (rights) ngutetba takoktemji liasü. Yamai inyak nung koda? taasüba nung tongtibang kar:

1. Khen election mapang nung dang masü, Clean election Campaign maneni inyaksüla aser takok tulu angutsü teimla nung inyaksüla.
2. ABAM-i tekeratiba nung finding Committee ka constitutes asütsüla aser Clean Election dak sendakba nung teinyaksü (plan of action) kanga junga renemer mapa kümtetta inyaksü asoshi apusotsüla.
3. ABAM kübok koba committee balala lir, talisa Social Concern Committee ajanga iba Clean election inyakyim long-term plan yur mapa kuma aser tashi ita bener aotsü lenmang bushiteptsü nungdak.
4. ABAM lenisüba nung Clean Election dak sendakba nung centralized Fund (ABAM kübok) mesüra lim arogo sasep nung budget ayutsüla aser Clean Election dak sendakba nung tetsükdaksü kecha maludaksüi mapa ajak takok ngua aotsüla.
5. Arogo project balala inyakba mapang politician (Minister aser MLA) dang nungi sen meshiba anentsüla aser lokti balalai iba ama mapa inyakba aitsütsüla.
6. Meyongnem nung ochimashi onsara lir. Yimtsüng ajak nung arogo züngsemdang nungi voterskenyongi teimba. Anungji arogoi yimden aser administration den angatettepba alima temzüangi melaba ama temelenshi bener arutsü merangtsüla. Arogoi iba nungi tasü ita nokdaksüla.

Tasü ita Tsüngrem tashi nung iba tongpang nung nokdaksü ajungshia Mr. Sobu-i 2 Putipuyang 15:7 "Saka nenok tasü ita liang, aser nenok teka tashi meiti teli kechiyong nenok mapa ajangzüktsütsü" zünga pa o tembang.

Tanabuba len sayur Rev Dr N. Tzüdir-i 1 Peter 2:9 "Nenok shimtetba kin aser chubar kin aser temeshi kin ka" iba nung ajemdaker Khristan tangatetba tsütsü nungi lemsatep. Election mapa ya repringdangra party balala lir saka tamangertem-i yanglutetba party pezü (4) indang lemsatep aser aji Money party, employment party, revenge party aser tatembangsa kidong/ yimtsüng party. Aser iba yagi teraksa, tamajung, timtem dang bener arutsür. Ibayongji kodang Nagaland ta südir Christ-less (Khrista makaba) State ka ta asenoki alima dang sayur. Anungji asenoki kanga dang kümdanga kechi koda asü nung ajungtsü aser inyaksü Lai O ajanga tangatetba agütsütsü nungdaker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

April 2 nü India tesem ajungalen Khristantemi Good Friday among



April 2, 2021 nü (Good Friday) Hyderabad nung aliba Khristan school ka nung kaketshirtemi Yisu Khrista Kangki apuba jilushi sayadang tangokba noksa nung angur.

Kolkata, April 03 (Agencies): April 02, 2020 nü India linük nunga state aika nung Khristantemi Good Friday sentong balala ayongzüka mongogo. Yisu Kangki nung metaba anogomong nung Khristantemi sarasademer, lumir aser nüngdakbapurtem nem teyari balala agütsür. Taküma coronavirus wara aliba agi ketdangsertemi lokti tulu adenshiba nokdanga liasü, ajisüaka state aika nung Khristantemi Tenla kidang adenshir tekülem sentong agitetogo. State aika nung Khristantemi Tenla kidang mask agiba den külemi nisung tsüngda tepila yur tekülem nung aden. Yakümbo wara anema linük aika shibangba agi Tenla kidang Good Friday aser Easter sentongtem magiteta liasü saka online ajanga dang tekülem sentong agi. Kolkata nung Tenla ki aika nung Khristantem adenshia sarasademba den külemi nikongdang Good Friday tekülem sentong agia liasü. Khristantem kanga longsoa tekülem sentong nung aden saka parnok ajaki social distancing benshia liasü.

Kolkata nung aliba Arogo aika nung lokti terabo ajemdaktsütsü atema hall balala nung Hindi oshi aser Bengali oshitem nung tekülem sentong agi. Iba dak alia teintet sensotema tekülem sentong nung dendaktsütsü atema tekülem sentong agibaji online ajanga live telecast asü. Hokolbar anepdang nungi tenzüka Khristantemi mangyimba temaitsü süoshi tanak semer Tenla ki 7 sema senzü. Kolkata nung tongti sentongji Most Holy Rosary Tenla ki aser St Paul's Tenla kidang agi; iba dak alia St. Thomas, Middleton Row, St Mary's Ripon Street, Prabhu Jishu Girja, Wellington, St Anthony's Chapel Market Street, Church of Christ the King, Sacred Heart Church, Church of our Lady of Vailankanni, Union Chapel aser St. Thomas Church nunga Khristantem kanga longsoa adenshir tekülem sentong agiogo. Yakümbo Kolkata nung Khristantemi temeshi hopta piyong- Palm Sunday, Good Friday aser Easter tekülem sentong ajak online ajanga

dang agia liasü. Bihar yimtiba, Patna nunga Khristantemi Good Friday anogo nung lumia sarasadem, Yisu Khrista tenüng sanga ken aten aser tekülem sentong nung dena liasü. Yimti nung aliba Khristantemi anepdang 'Way of the Cross' tekülem sentong agi; coronavirus wara mesüngjemba agi takümbo Khristantemi yimti yimdong süa mejaja. Hokolbarnü New Delhi nunga Sacred Heart Cathedral Tenla ki kima tekülem sentong agi saka Tenla ki telungi aitsübo memela. Goa yimtiba, Panaji nunga Khristantem Immaculate Conception Arogo Tenla kidang tekülem sentong agi Tenla kima thermal screening agi aser nisung ajak nem hand sanitizer agüja liasü. Puducherry nunga Khristantem Sacred Heart Basilica Tenla kidang adenshir tekülem sentong agiogo. Khristan yimsü nung benjung tulutibaji Easter lir, saka coronavirus wara anema Tenla kitem shibangdaktsüba agi yakümbo Arogo aika nung iba sentong ya yimya balala nung agia liasü. Khristantem atema Tsüngrem chir Yisu Khrista alima nung aliba tatembangbuba hopta ya kanga tongtibang. Arogo aika nung Passion Week matongdang nungi Khrista timtemba, Tsüngremi tatok agütsüba aser tekümtet agütsüba indang Tsüngrem O agi Arogopurtem mesüa arur. Iba hopta nung Khristantemi talisa Yisu Khrista Yirusalemi takok ngua aiba (Palm Sunday), Yisu Kangki nung metaba anogo (Good Friday) aser shia aruba anogo Easter Sunday kanga metsünga reta amonger.

ANOGO ABEN TSÜNGREM DEN

NAI KOMALA TOLA ASEMER?

"Anungji Tsüngrem meyong shimtetba ama aser temeimba, aria bilemba temulung yimlibilem, tila akümba, ajemaluba, talangka aremzükbba item sübuang."

Ocet tila ka nung züngshibaji Liverpool club-pur jersey kechiba tang ya kanga sabua asemer ta asü nung parnok goal keeper, Alisson Becker-i asemba agi ta langzüba ka zülua angu. Tolaji masü saka shibai asemer iba jagi tola jenjangji kadaktsür. Iba ocet züngshidang laishiba nunga sübutsü indang shia aliba bilemteter. Paul-i Kolosi nunger dang temeimba, aria bilemba temulung yimlibilem, tila akümba, ajemaluba, talangka aremzükbba item sübuang ta shia lir. Tamanger ka tanela tolaji item ayakji lir; kechiaser Yisua ibaji sübu aser jenti pa sülen anidak. Mamanger puatsübaji asen dak itemji sübua lira tangari aseni asemba jaklaji nükshia akümtsü. Kibubai asenok nem tenyaba mapa nungloktsübaji asen taküm libaliro, yimyakoya, aser asen jembishinü agi Yisu tobur ajungji sayutsü nungloktsü. Asenok Yisu nütsüngtem aliba yimya agi yangpanga sübuba agi samaba tanela anir marutettsü, saka ajemaluba, tila akümba, aremzükbba itemji sübuba agi Yisu tali meteta kümdaktsütsü. Na-a kechi koma tola süma lir?

SARASADEM

Temeim Yisu, ne yimya agi ni sübua alitsü teti ni yariangma, kechiyong karibosa ni reprangdar. Anungji Ne tobur ajung angutsü, ni ajemaluba sübutsü sübudi. Amen

Northern Ireland nung Tenla kidang Easter tekülem sentong agitsü

April 03, 2021: Hokolbarnü Rev. Trevor Gribben-i, Arogo Northern Ireland kübok Belfast nung aliba St. Anne's Cathedral nung Hokolbar nikongdang ghonda asem tashi tekülem sentong agia liasü; Northern Ireland nung Methodist, Presbyterian aser Church of Ireland Arogotem nung Tenla kidang lokti adenshia tekülem sentong agi tenzükogo. Catholic Arogotemibo March 26 nungi tenzüka Tenla kitem tanaben lapoka liasü. Coronavirus wara anema taküm January ita nung Northern Ireland nung aliba sentong agitsü saka wara tongti Arogo pezüi Tenla ki shibanga liasü, ajisüaka temeshi kanga kümdangtsü jelia hopta nung Tenla kitem tanaben lapoker. Northern Ireland nung Hokolbar nikongdang Arogo aikati Good Friday tekülem sentong agi saka Arogo timbakati aonung agia liasü. Belfast nung aliba St Anne Cathedral nungbo anüngdang nungi tenzüka ghonda asem tashi tekülem sentong agi. Coronavirus anema Tamalen Methodist Arogo nungi Rev. Roy Cooper-i, Good Friday nungi Tenla kitem lapoktsü saka tang tashi Arogo nung züngsem aikati lokti adenshiba tesemi aotsü kanga arendaker, ta jembia liasü. Arogo densema Arogo karibo Presbyterian Church nungi

Rev. Trevor Gribben-i, Arogo züngsem aikati Tenla kidang adenshia tekülem sentong nung adentsü kanga yongyar, ta ashi. "Live-streaming aser online tekülem sentong maneni agidar, aser iba atemaji aikati pelar, ajisüaka amangbapurtem külemi adenshia Kibuba külemba bosa matoksar," ta Rev. Gribben-isa metetdaktsü. Northern Ireland nung Khristan putirtemi, Temeshi Hopta aser Easter nung Tenla kidang lokti adenshia tekülem sentong agitsü saka wara prokba nokdangtsü atema ajaki kanga kümdangtsü jelia metetdakja liasü. Lokti adenshia tekülem sentong agitsü jelia Arogotem aser Covid-19 support team-i lenla ajak nungi asadangba sülen Tenla kitem lapoker, ajisüaka peipei Arogo sasep nung tensa dak apet Tenla kitem melapokyonga kecha masü, ta lenirtemi metetdakja liasü. Coronavirus anema tanaben tenokdangbatem benokba sülen January ita nung lokti adenshia tekülem sentong agiba anen, ajisüaka north Belfast nung Whitewell Metropolitan Tabernacle Arogo densema Arogo karibo tenla kitem meshibang.

EASTER SUNDAY KEN :


- Mr. Y. Imti Tzüdir

PA SHIA ARUOGO

Key B flat 3/4

: s, |s, :l, :s, |d :-:d |d :-:t, :l, |s, :-:s, |s, :l, :t, |d :-:t, :d |r :-:|- :-:
: m, |m, :f, :m, |m, :-:s, |l, :-:s, :f, |m, :-:m, |r, :r, :s, |fe, :-:fe, :fe, |f, :-:|- :-:
1.Oh kü Kibu- ba shi- a a- ruogo, Tasü ma- dak ta- kok a- ngu,
2.Ga-lil tenem nung Yi- su- a- shi, “Nenok den te- sü- nep li- ang”.
3.Toma dena nü- tsüngtem dang a-shi, “Kü te- ka- pu nai reprangang”
4.O- liv tenem nung ya- mai a- ta- lok. Tane- la ain a- rur kü- len,
: d |d :d :d |s, :-:d |d :-:d :d |d :-:d |t, :d :r |r :-:r :d |t, :-:|- :-:
: d, |d, :d, :d, |d, :-:m, |f, :-:f, :f, |d, :-:d, |s, :s, :s, |r, :-:r, :r, |s, :-:|- :-:
:
:s, |s, :l, :s, |d :-:d |r :-:d :r |m :-:m |f :-:m :r |m :d :r |d :-:|- :-:
:f, |m, :f, :m, |m, :-:s, |s, :-:s, :s, |s, :-:ta, |l, :-:l, :l, |s, :m, :f, |m, :-:|- :-:
Ha-li- lu-ya ta Pa nüng sangangma, Oh kü Ki- bur shi- a ‘ruo- go.
Kü te- ka te-tsüng ta- rak reprangang, Ya a- tang-ji Ki- bur Khrista.
Mamangi te- li To- ma a- mangang, Mungui a- mangra mo- a- tsü.
O jem- bi- a rep- ranga a- li- dang, Me- pet nung me- ner tu- o- go.
:t, |d :d :d |s, :-:d |t, :-:d :t, |d :-:d |d :-:d :d |d :d :t, |d :-:|- :-:
:s, |d, :d, :d, |d, :-:m, |s, :-:m, :s, |d, :-:d, |f, :-:f, :f, |s, :s, :s, |d, :-:|- :-:
:
LEPLAZÜ (CHORUS):
:s, |s, :-:s, :s, |s, :s, :-:d |t, :-:d :r |d :-:d |m :-:r :d |d :-:t, :l, |m :-:|- :-:
:m, |m, :-:m, :f, |m, :m, :-:s, |s, :-:s, :s, |s, :-:s, |s, :-:s, :s, |l, :-:m, :m, |se, :-:|- :-:
Pa shi- a a- ruo- go, Le- per ko- kogo, Par- nok dang tenya- ri a- shi.
:d |t, :-:d :r |d :d :-:m |r :-:m :f |m :-:m |m :-:m :m |m :-:d :d |t, :-:|- :-:
:d, |s, :-:s, :s, |d, :d, :-:d, |s, :-:s, :s, |d, :-:d, |d, :-:d, :d, |l, :-:l, :l, |m, :-:|- :-:
:
:m |m :-:r :m |d :-:s, :s, |m :-:r :m |d :-:s, |l, :l, :-:f |m :m :-:r |d :-:|- :-:
:s, |s, :-:f, :s, |m, :-:m, :m, |s, :-:f, :s, |m, :-:m, |f, :f, :-:l, |s, :s, :-:f, |m, :-:|- :-:
Pa yangi mali, Pa shi- a a- ruo- go, Nü- tsüngtem dang o- a shi- ang.
.d |d :-:d :d |s, :-:d :d |d :-:d :d |s, :-:d |d :d :-:d |d :d :-:t, |s, :-:|- :-:
.d, |d, :-:d, :d, |d, :-:d, :d, |d, :-:d, :d, |d, :-:d, |f, :f, :-:f, |s, :s, :-:s, |d, :-:|- :-:

OLONG PAITEP # 5771



TIPIEN

2. Teka mapa tajung

- (8)

4. Anakshinüba

- (5)

5. Süoshi agi tazü

- (4)

9. Aria bilemtep

- (7)

11. Ajemalu ozü

- (4)

12. Tzü an

- (5)

13. Teben teloktep

- (8)

LANGTSÜNGLEN

1. Anepalua inyak

- (7)

2. Teptsü

- (4)

3. Nok agi raratep

- (6)

6. Kibong aküm

- (4)

7. Nüji masü

- (4)

8. Taruba küm

- (7)

9. Teka shidok

- (6)

10. Meputep/Mapet

- (4)

OLONG PAITEP # 5770 TELANGZÜBA

TIPIEN :

1. Yimlibilem, 4. Anak, 5. Tangar, 7. Aya, 8. Arong, 11. Par, 13. Lemjem, 14. Oagi, 15. Mulung.

LANGTSÜNGLEN :

1. Yongya, 2. Moko, 3. Marok, 5. Teronem, 6. Nung, 8. Amajok, 9. Jangzü, 10. belem, 12. Rong.



ALOKBA-I ITASEN KIDANGI BENER MARUR

Warakla : Hai...Saheb-ba...Koa joko nenok itasen ngur hopta ka jungnua sua aor... Kodaser itasen bener marur...??? Tanürtem school fee & duetion fee kong nungi agütsütsü... ??? Kidang tang sorotsü jang tera-kata mali...Ssaallaaa.

Alokba : Ayyaa...Topur ajungla...Osu ajungla...Kechisarena ajak agi pelakshia azüla... Ni na kü kinungtsü asutsü agishiba ya kanga asuküma bilemer nung koda-ka... Imlibilema khen aremzüka ataa liang nii... Ni asungbo bener arutsü ako.

Warakla : Ayyeeeeee...Bangso-banglem...Tsümo-tsüra oji ojang jembiang...Na itasen ya kong kechi nung endokma'ar aji tamasa shiangjo...Yi Hotel nung paki ajemba sentsüh nung endokma asu ??? Dash asayadak endokma ??? Taaktsüka Kecha maka sur O-bo tulu-lu jembitsü... Anu-adok nungi anu-ayi tashi yi agi longa oa meseper alitsü...Na iba ama aliba yagi chimura-a tangar dang aakseter....Joko asen kibong tangar menudong kibong ka kümadokogo nii.

Alokba : Ayyaaa...Tantsü ni Yi Hotel nung paki agi ajemba aser Dash asayadak itasen ajak endokmaogo.... Ni tang nungibo yi majemtsüTaruba ita nungibo ni kü itasenji shitak bener arutsü nangzüker ako...imlibilema aremzükanng nii.

Lilir : L.Kika Pongener.

TANÜBO NAI LANGZÜANG

Q. Pong Dam ya ____ küm yanglua liasü.

A.1975

B.1976

C.1977

D.1987

===== (Taruba adok nung onoki langzütsü)

YASHI ADOK TELANGZÜBA : 315 kilometers

AO OSHI ANGAZÜKDAK:

TANÜ ANGAZÜKTSÜBA OJANG



Athi

(v) Aotsü renemba mao. Senden alitsü renemba malitsü lemtet. Mapa inyaksü renemba meinyaki atatsü lemtet. (posypone)

* Tensa majungba agi senden sentong *athi*.

Ati


(adj) aremzükanng mesüra akok (forbearing)

· Pai nüngsen kanga *ati*

NAI-A YA METETTER MA?

ALIMA NUNG NÜNGTUGU ONLINE GAME KAR:

- PUBG
- Apex Legends
- League of Legends
- Minecraft
- DOTA 2
- Fortnite
- World of Warcraft
- Overwatch
- GTAV
- The Witcher 3: Wild Hunt
- Call of Duty: Modern Warfare (2019)
- Fallout 4
- Assassin's Creed Odyssey
- Rocket League
- FIFA 20



SUDOKU # 5814

	2		6				4		3	8	1	4	6	2	9	5	7
6	8	3	2	7					4	9	7	5	8	1	2	6	3
		7	3		9		6		2	5	6	7	9	3	1	8	4
3	6		4						9	7	5	6	2	8	3	4	1
2			1		6	7	5		6	4	3	1	7	9	8	2	5
	7			9	2		1	3	8	1	2	3	4	5	7	9	6
			9	6			8		7	2	4	8	3	6	5	1	9
		5		4					1	6	9	2	5	7	4	3	8
		6		2		4			5	3	8	9	1	4	6	7	2

TELANGZUBA # 5813

OJANG LUTEP # 5358

DAKING :

KÜTSAZÜ :

AKD :

AKALA :

NGTAA :

CHITTASÜ :

ÜRMESA :

GITTASÜ :

ECKHA :

KAMA :

OJANG LUTEP TELANGZÜBA # 5357

TEPELA MESÜRA TIMTEM PEI SHISATSÜI BILEMBA
DANG NUNGI TALI AJURU

TAN HOPTA ATEMA - KOMA SÜLA ?

Q. Myanmar nunger nübortem par lima nung sepaitem tsübuba agi süngjema melitet, parnok meyririjang anasemka Nagaland nung khen atema tejenokdak bushia arua nunga koma süla ?

Olong 20 shi nung April 09, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



Hooghly, April 03, 2021: Honibarnü West Bengal kübok Hooghly district nung election nüboyim sentong ka nung Chuchura constituency nungi candidate, Locket Chatterjee-i Ato kilonser, Narendra Modi nem nüngo ka agütsüba noksa nung angur.

John Kerry-i Climate Summit atema jembitsü asoshi India semdangtsü

New Delhi, April 03 (Agencies): Special Presidential Envoy for Climate, John Kerry-i April 5-8 anogotem nung India semdangtsü aser iba mapang nungji pai US Tir, Joe Biden-i ayongzüka aliba Leaders' Summit on Climate aser taküm agitsü aliba COP26 meet atema tongtibang onüktem nung o lemteptsü, ta ministry of external affairs (MEA)-i metetdaksü.

MEA otongdar, Arindam Bagchi-i, US Tir, Biden-i Leaders' Summit on Climate nung adentsü atema Ato kilonser, Narendra Modi jaokogo; iba senden ya online

ajanga amentsü, ta metetdaksü. US Tiri iba senden nung adentsü atema jaokba atema Ato kilonser, Modi-i agizükogo; iba senden ya April 22-23 anogotem nung amentsü, ta MEA-i metetdaksü.

Taruba hopta Kerry-i India semdangtsü aliba dak sendakba nung osangbenertemi asüngdangba ka langzüdang MEA otongdar Bagchi-i, special presidential envoy on climate, Kerry-i April 5-8 anogotem nung Delhi semdangtsü aser iba mapang nungji taruba leaders' summit on climate atema lemteptsü, ta metetdaksü.

Taküm küm tatembanglen UN climate change summit

COP26 senden-a amentsü aser Kerry-i iba atemaji-a o lemteptsü, ta otongdari metetdaksü.

"Kerry-i semdangba mapang nung pai external affairs minister, ministers of finance, petroleum & natural gas minister, environment minister, power & new and renewable energy minister densema minister aika ajurua jembitsü imlar," ta Bagchi-i ashi.

Climate senden atema US Tir Biden-i Modi densema linük balala nungi lenir 40 jaokogo, aser iba senden nung climate action atema jembitsü, ta White House-i metetdaksü.

India nung ano nisung 89,129 dak coronavirus putet aser 714 asü

New Delhi, April 03 (Agencies): India nung ano nisung 89,129 dak coronavirus tashidak putetogo, aser ibaji tesüiba ita trok ser tesadang tsüngda anogo ka kija nung nisung timtiba dak putetba lir; India nung coronavirus case ajak agi 1.23 crore jungogo.

Tesüiba anogo ka tsüngda iba tashidak putetba shilem 81.42 bo state 8- Maharashtra, Karnataka, Chhattisgarh, Delhi, Tamil Nadu, Uttar Pradesh, Punjab aser Madhya Pradesh state tem nung lir, ta Health ministry-i metetdaksü.

Tang India nung coronavirus tashidak agi teshirangdakpur 6,58,909 lir aser nisung ajak agi 1,15,69,241 anepogo, ta Union health ministry data nung shia lir.

Tesüiba ghonda 24 nungsa India nung iba tashidak agi nisung 714 süogo aser iba tashidak agi asür ajak agibo 1,64,110 jungogo.

Yaküm September 20 nü nisung 92,605 dak iba tashidak putetba sülenbo anogo ka nung tang nisung timba dak iba tashidak puteter.

Tesüiba anogo 24 tashi linük nung iba tashidak agi teshirangdakpur timba-timba kümdar aser iba tashidak agi anepba shilembo tajemba küma shilem 93.36 dang kümogo, ta ministry data nung shia lir.

Taküm February 12 nü iba tashidak agi teshirangdakpur 1,35,926 dang liasü saka tangbo lakh 6 dak tema kümogo; ano iba tashidak agi shiranger asüba shilembo 1.32 dang kümogo.

Yaküm August 7 nü India nung coronavirus case lakh 20 ajung, August 23 nü lakh 30 ajung, September 5 nü lakh 40, September 16 nü lakh 50, September 28 nü lakh 60, October 11 nü lakh 70, October 29 nü lakh 80, November 20 nü lakh 90 ajung aser December 19 nü coronavirus case crore 1 junga liasü.

Indian Council of Medical Research (ICMR)-i ashiba agi, tang tashi nung linük nung coronavirus atema samples ajak agi 24,69,59,192 tendangogo, aser iba nungji Hokolbarnü samples 10,46,605 tendangba densema lir.



New Delhi, April 03, 2021: Honibarnü Parliament House Annexe, New Delhi nung Union Minister for Minority Affairs, Mukhtar Abbas Naqvi-i coronavirus vaccine tanabuba dose agiba noksa nung angur.

India nung telemsa aliba agi China-i India nung litsü agir: Rahul

New Delhi, April 03 (Agencies): Congress lenir, Rahul Gandhi-i, India tashi meiti akümba aser telung nung telemsa aliba reprangtetba agi China-i maneni India nung litsü agir, ta ashi.

Hokolbarnü Harvard Kennedy School nungi Ambassador Nicholas Burns den sensaksemba mapang Kerala nung Waynad nungi Congress MP, Rahul-i, "Ana

sensaksemba mapang nunga China-i asen li atsünga agidar, kechiyong China-i India tashi meiti akümba angur, India nung telemsa adoka lir," ta ashi.

"India tashi itra aser asalentong tajung lira China anema inyaksü atema India-i timtem kecha majurutsü," ta paisa ashi.

Rahul-isa, tang India nung sorkari institutions ajak raksatsür; shidakba agibo

yimtenren kümzüksü atema item institutions-i inyaksüla, ta ashi.

"Election nung tokteptsü atema ni item institutions nüngdaker- ni kümzüksü atema judicial system nüngdaker, ni media tajung nüngdaker aser yimtenren party ka inyakyim atema ni item institutions nüngdaker, saka kü ket nung itemji mali," ta pai ashi.

Chhattisgarh nung Maoists telungpur den raradang sepai 5 asü

Raipur, April 03 (Agencies): Honibarnü Chhattisgarh nung Bastar division kübok Bijapur district nung Maoists telungpurtem den raradang security sepai pongu asü aser aika yiruogo.

Police ketdangser kati ashiba agi, Sukma aser Bijapur arrtsülen arem nung tang teraradak, anungji nisung asüba mesüra yiruba ano timba akümtsüa akok.

Police ketdangseri, "Special task force, district reserve guards aser CRPF sepai densema sepai 400 senteper arem nung telungpur mita aoba mapang nung Maoists telungpurtemi lenmang nung mendanger amak. Maoists telungpur aika arem nung adenshia commanders den senden mendar, ta osang ka angazükba nung ajemdaker pamok mita ao," ta metetdaksü.

Bastar range inspector general of police, P Sundarraj-i, security sepaitem den jembiba sülen ang osang tejangja metettsü; tang iba tesem nungji kümzükba maparen inyakdar, ta metetdaksü.

Tarrem police station kübok Tekulgudem yim anasa arem nung Maoists pur tasümanga ana ang, ajisiüka iba dang nungjagi timba sür asütsüa akok, ta osang angazükür.

"CRPF, Chhattisgarh nung DRG aser STF teams senteper Cordon and Search Operation

aoba mapang nung CRPF ana aser state police asem süogo," ta CRPF IG, C.G. Arora-i metetdaksü.

Kasa rara nungsa sepai 20 shi yiruogo.

"Aremji kanga temelen aser iba tesemji Maoist aliba tiyongtsü tesem ka lir, anungji arem nemboka senzütsü kanga tasak, ibayongji sepaitem nem helicopter-a agütsüogo," ta Arora-isa metetdaksü.

Chhattisgarh Chief Minister, Bhupesh Baghel-i sepai pongu asüba atema jashia mangyim osang lemsatepogo.

Asür kibongtem den mangyim lemsatepa den külemi Baghel-i, "Sepaitemi taküm tenla agütsübaji amajokbosa masütsü. Asen sepaitemi Maoists kanga yirutsüogo, aser sepaitemi Maoists anema maneni inyaksü," ta metetdaksü.

Chief Minister-isa ketdangsertem dang yirua alirtemji tajungtiba agi anepalutsü tuyu.

Anogo ter tejaklen Narayanpur district nung DRG sepaitem bus ka nung aoba mapang nung Maoist telungpurtemi IED bomb amshia amakdang sepai pongu pokseta liasü.

March 23 nü Kanhargaoon-Kadenar tsüngda arem nung telungpurtemi IED dak pokdaksüba lendong nung District Reserve Guard pongu asü aser aika yirua liasü.



Mumbai, April 03, 2021: Coronavirus tashidak agi shiranger timba akümba agi Mumbai nung aliba NESCO Jumbo COVID-19 center-i yipten tali bener arusemba noksa nung angur.

Myanmar nung longkak aiter pongu tepset



Yangon, Myanmar nung longkak aiter temi kidang yangluba prangbong bener nokdakba noksa nung angur. Longkak aiter temi aputsü aser lendong tuluba bener arutsütsü amokmerenaka Myanmar nung nüburtemi maneni military atsüngina nüburtemi shiba sorkar amenoktsü khanga arudar.

Yangon, Rongchii/April 3 (Agencies): Hongibarnü Myanmar security forces-i longkak aiter temi dak injang khaloktsüba sülen nisung pongu khasetogo, ta longkak aiter ka aser media sangdong balala ajanga metetdaksü. Internet shibangtsüba den online ajanga military aitsürtem aputsü tuyuba dak sendakba nung tebilemba balala aliba tembangtsütsü asoshi military-i asendenshir inyakba mapang iba lendong atalokogo.

February 1 nü military-i sorkar atsüngtokba sülen nisung 550 dak tema tepseter liaka longkak aiter temi anogoshia jila balala nung military yimsüsüba benokba anema nokdaka arudar.

Honibarnü Monywa jila nung security force temi longkak aiter telok ka dak injang khalokja nisung asem tepset, ta Myanmar Now news service-i ashi. Kasa mapang nung Bago jila nung nisung ka aser Thaton nunga nisung ka tepsetogo, ta Bago Weekly Journal online news portal sangdong ka ajanga metetdaksü.

"Parnoki grenade aser prongbong agi tanen makai akha. Iba sülen nüburtem atsüngin aser takaratiba nung injang nokdangtsü asoshi tongbang, ajisüaka kü jakdang nokdaka aliba nisung ka dak tekolak nung injang agi akha. Pa iba tesem nung süadok," ta longkak aiter kati ashi.

Iba tatalokba dak sendakba nung police otongdar aser junta-i kecha telangzüba magütsü.

Assistance Association for Political Prisoners activist group-i Honibarnü ashiba agi,

Military-i Aung San Suu Kyi-i aniba sorkar atsüngtokba sülen security force-i nisung 550 tepsetogo aser item rongnung tanur 46 densema lir.

Yimti tulutem nung nisung meyrejang aika adenshia longkak aitba anenogo saka longkak aiter temi security forces temi telangzüba magütsü tsüngda takaratiba nung longkak aitba sentong agili senshili ta inyaka arudar.

Maneni nüburtemi aonung adenshia shimo milen tsükdaka meita arudar.

Ketdangsertemi tang osang balala prokshiba azüoktsü merangdar. Parnoki mobile data shibangtsü aser Hokolbarnü internet agütsürtem dang wireless broadband magütsütsü asoshi ozüng agütsü aser iba ajanga customer temi tetsükdaksü ajangshiogo, ajisüaka noksa aser osang karbo social media nung agütsüogo.

Ketdangsertemi social media influencer tem aser osangbener ana densema celebrity 18 aputsü tetuyuba agütsüogo. Parnoki armed force tem ketdangsertem anema nokdaksü mesera parnok mapa sentoka toktsütsü atem ajungmesoba atema temzüng ozüng ka kübok aputsü tetuyuba agütsü, ta state media-i Hokolbarnü metetdaksü.

Parnok ajak ya military yimsüsüba anemertem lir. Iba taitzüba kübok parnok küm asem tashi tepuokdak ayutsü akok.

Actress Paing Phyoe Thu-i ashiba agi, la tasümeiti malitsü.

"Aputsü atema tetuyuba agüjang tagütsü, ni taküm ali

tashibo ni military dictatorship anema nokdaksü, shirnoki nüburtem rishikangshir aser tepseter. Longkak aitba maneni aotsüla," ta lai facebook nung ashi.

Sorkar atsüngtokba sülen Paing Phyoe Thu-i, Yangon nung longkak aitba sentongtem nung teti dena aruogo. La kong ali ajibo tejangja memetet.

State broadcaster MRTV-i, nisung 18 aputsü atema tetuyuba agütsüba indang screenshots aser parnok indang Facebook profiles links tem lemsatepba sangdong.

Military-i Facebook amala sabangtem shibangtsüogo, ajisüaka parnok parnok aitsürtem bushitsü aser parnok indang osang prokshitsü atema maneni amshidar.

MRTV-i YouTube channel ka achayanger aser parnok indang broadcasts den Twitter ajanga link lemsateper. Iba sabang anaprongla ya tenokdangba agütsür lir.

Sorkar atsüngtokba ajanga anüdok aser anüdok tiplen aliba telungpurtem den mangatetep tenzüksüogo.

Myanmar nung telungpur telok tejentiba Karen National Union (KNU)-i pro-democracy movement pusemba sangdongba sülen küm 20 tsüngda tang mezüngbuba anüng ajanga parnok sepaitem amakba ajangshiogo

KNU-i ashiba agi, tayimtsü amshia amakba ajanga yimdaklir 12,000 dak tema pei ki toktsür jenshiogo.

Osang balala ajanga shiba agi, iba lendong nung nisung 20 dak tema tepsetogo.



Hualien, Taiwan nung Taroko Gorge anasa teküzmükertemi tsükoker aliba train ka nungi shilem ka aginba noksa nung angur. Gari ka den tsüktepba sülen train ya nüngküm kati alu aser iba lendong nung nisung aika asüba den yiruogo.

Bangladesh ajunga anogo 7 mokdanga ayutsü

Dhaka, Rongchii/April 3 (Agencies): Bangladesh nung COVID-19 tashidak menar aser tashidak agi asür timba akümba sülen sorkari Hombarnü nungi tenzüka linük ajunga Hopta ka mokdanga ayutsü telemetba agiogo. Honibarnü Road Transport Minister Obaidul Quader-i osangbenertem den sensaksemba mapang iba osang sangdonga liasü, ta Dhaka Tribune osangkaket sangdong ka ajanga metetdaksü.

Bangladesh nung Hokolbarnü nisung 6,830 (anogo ka nung timtiba potetba) dak coronavirus tashidak poteta tang tashi nung tashidak menar 624,594 jungogo. Kasa mapang nung ghonda 24 tsüngda tashidak agi nisung 50 asüba sülen asür 9,155 jungogo, ta sorkar sangdong ka ajanga metetdaksü. Coronavirus tashidak menatepyonga aoba nokdangtsü atema sorkari Hombarnü nungi tenzüka linük ajunga mokdanga ayutsü telemetba agiogo, kechiyong linük nung tashidak menar aser asür timba küma odar, ta Awami League general secretary Quader-isa ashi.

Ajisüaka tenüngdakba maparen aser jongdak maparentem iba tenokdangba küboki maittsü. Factory tem maneni inyaksangshitsü saka mapa inyaktertem shift lemsar

inyakdaksütsü, ta kasa sangdong ajanga metetdaksü.

Linük mokdanga ayuba mapang office aser okadak ajak shibanga atatsü, saka industry aser mill tem temelenshi ka bener aruru maneni inyaksangshitsü, ta State Minister for Public Administration Farhad Hossain-i ashi. Industry tembo kechiba lapoktsü ta asüngdangba mapang pai, mill tem shibangra mapa inyaktertemi pei kidangi meyipa aotsüsa akümtsü, ta langzü. Bangladesh nung Bodhbarnü nisung 5,358 dak tashidak potet, koba taoba küm March ita wara poktetba sülen anogo ka nung nisung timtiba dak tashidak potetba liasü. Hombarnü Ato Kilonser Office-i tetuyuba 18 agütsü, kong tashidak kanga bulua menatepba tesemtem nung nüburtem adenshitsü asoshi tenokdangba agütsüba densema lir.

Gazette notification ka ajanga, tamangba, loktiliba aser yimden yimsüsüba dak sendakba nung sentongtem ajak tajemba agitsü tuyuogo. Kasa mapang nung bus tem nung nüburtem tesadang dak tali mabentsü aser COVID-19 nung jenboa alitsü atema tetuyuba agütsür aliba sülen anidaksü metetdaksüogo.

NK den yimjung yanglutsü atema China-i shilem agitsü imlar: Chung

Seoul, Rongchii/April 3 (Agencies) : United States aser tembar linüktemi denuclearize südaksütsü atema Pyongyang maneni nongshitsü telemetba agir aliba mapang South Korea foreign minister-i Honibarnü, South aser North Korea na tsüngda yimjung yanglutsü atema China-i tongtibang shilem agitsü imlaba lemsatepba den China tir dang par linük semdangtsü jaokogo.

"Korean Peninsula denuclearize asütsü aser teti asoshi yimjung bener arutsü atema South Korea aser China na nükjidong kasa dang lir," ta Chung Eui-yong-i ashiba South Korean news agency Yonhap sangdong ka ajanga metetdaksü.

Chung-isa, Covid-19 wara süshiba sülen par linük semdangtsü atema China tir Xi Jinping jaokogo.

Honibarnü Chung-i, China nungi State Councillor Wang Yi den China kübok Xiameen yimti nung ajurutepogo, koba 2017 küm sülen South Korea foreign minister kati China semdangba mezüngbuba asütsü.

Wang-i ashiba agi, China aser South Korea nati Korean Peninsula nung ken o balala adoker aliba bentettsü atema inyakteptsü mulungtepogo, ta Yonhap sangdong ajangsa metetdaksü.



Chung Eui-yong

Hokolbarnü United States, Japan aser China nungi national security ketdangsürtemi, nuclear aser ballistic missile programme tem agintsü atema North Korea nongshitsü aser North Korea nung United Nations Security Council resolutions benoktsü nüngdakba mulungtepa agizükogo.

Shishilembaba tsütsü partner tulutiba den tesendaktep yanglushitsü merangba mapang ka nung Chung-i China semdangogo. 2016 küm South Korea nung US antimissile system ka amenokba ajanga linük tourism, cosmetics aser entertainment industry tem dak kongshia liasü.

ZEISS Triple Camera aketba Vivo X60t saya



Mumbai, Rongchii/April 03, 2021 (Agencies): China indang smartphone yangluba company Vivo-i, Vivo X60 series nung 'Vivo X60t' sayaba sangdongogo. Vivo X60t smartphone jenjang CNY 3,498 (sen 39,000) alitsü aser phone ya 8GB RAM + 128GB storage variant nung dang angutsü.

Vivo X60t ya sentsü ana - Shimmer Blue aser Midnight Black nung angutsü. Vivo X60 series nung Vivo X60t ya variant tasenba alitsü aser iba series nung Vivo X60, Vivo X60 Pro aser Vivo X60 Pro+ dena lir. Vivo X60t nung MediaTek Dimensity processor aser Vivo X60 series kübok tanga smartphone tem nung Qualcomm Snapdragon processor inoka yanglutsüogo.

Android 11-based OriginOS

1.0 software ajanga Vivo X60t maparen achaayangtsür aser smartphone nung 6.56-inch full-HD+ AMOLED display den 19.8:9 aspect ratio aser HDR10+ support angutsü. Iba den külemi octa-core MediaTek Dimensity processor den 8GB RAM aser 128GB internal storage ajanga smartphone inyakyim nungitter.

Camera atema, iba smartphone tesülen ZEISS meyong triple camera setup ka angutsü, koba tanga Vivo X60 smartphone nunga kasa camera feature dena lir. Iba camera set-up nung 48-megapixel primary camera, 13-megapixel ultra-wide camera aser 13-megapixel tertiary portrait sensor inoktsüogo. Selfie jangrar atema, iba smartphone tejaklen 32-megapixel camera angutsü.

Iba phone nung battery tasazük 4,300mAh alitsü aser 33W fast charging densema lir. Connectivity atema, Vivo X60t nung USB type-C port, Wi-Fi 6, Bluetooth v5.2 aser tanga aika inoktsüogo.


India shishilembadak iba smartphone ayoktsü asoshi company ajanga osang tejangja magütsü. Tawa, Vivo-i Vivo X60, Vivo X60 Pro aser Vivo X60 Pro+ India nung sayaba ajaki jangjaa lir. Iba Vivo series nung Vivo X60, Vivo X60 Pro aser Vivo X60 Pro+ dena lir. Vivo X60 aser Vivo X60 Pro nung Qualcomm Snapdragon 870 chipset aser Vivo X60 Pro+ nung Qualcomm Snapdragon 888 SoC ajanga tashi agütsür.

Maneni, Vivo X60 series - 8GB RAM + 128GB storage variant jenjang sen 37,990 aser vanilla Vivo X60 indang 12GB RAM + 256GB storage variant jenjang sen 41,990 alitsü. Vivo X60 Pro - 12GB RAM + 256GB storage variant jenjang sen 49,990 alitsü. Ano külen, Vivo X60 Pro+ - 12GB RAM aser 256GB storage variant jenjang sen 69,990 asütsü. April 02, 2021 nü nungi item smartphone ayok tenzüko.

Peele indang project nung Steven Yeun denogo

Los Angeles, Rongchii/April 03, 2021 (Agencies): Jordan Peele indang taruba project ka atema actor Steven Yeun aniokogo.

Taoba film - 'Walking Dead' nung shilem agisang, Steven-i Daniel Kaluuya aser Keke Palmer naprongla den külemi iba project nung shilem agitsü. Iba film ya 2022 July ita sayatsü imlar.



Nüngtugu horror film 'Get Out' aser 'Us' nung Universal den longjemmer sülen, iba movie nung Peele-i Studio den tasembenbuba longjemmer alitsü.

Iba project atema Peele-i script zülutsüogo.

Box office nung 'Get Out' film takok tajung anguba den külemi critics nungi telengzüba tajung jenti nguogo.

Iba film nung Daniel aniokba ajanga film yangluri arendaka bilemba lemsatop yongjia, Get Out film ajanga Best Original Screenplay atema Peele-i Academy Award angu.

African-American nisung ka taküm otsü atema British nung actor ka aniokba ya tim masü ama Peele-i arendaka bilem.

Arishi küm 42 tain director Peele-i, "African-American otsü ka asünung, film nung British actor ka nem shilem agidaktsütsü asoshi ni memulung. Skype ajanga ni Daniel den sensaksema liasü, kong pai iba film otsü dak sendakba nung sensaksem," ta ashi.

Ajisüaka, maparen junga asadangshiba sülen, Chris Washington atema Daniel ya actor tetemjen ka asütsü ta Jordan-i lemtet.

GOVERNMENT OF NAGALAND

DIRECTORATE OF TECHNICAL EDUCATION

NAGALAND: KOHIMA-797004

NO. DTE/ ESTT-2/02/2020-21/

Dt. Kohima, the

3rd April. 2021.

NOTIFICATION

The prescribed application forms for the Nagaland State Entrance Examination (NSEE) 2021 for Agri& Allied / Paramedical Degree courses may be collected from the Directorate of Technical Education, Kohima (Below Nagaland Civil Secretariat Complex) on payment of Rs. 200/- (Rupees two hundred) only per set with effect from 5th April, 2021 to 4th May, 2021 during office working hours. The form may also be downloaded from the website www.dtenagaland.org.in in which case the fee should be paid while submitting the form printed in white paper (A4 size).

The last date for receiving the complete forms whether by hand or post is 4th May, 2021. Students who have appeared and are waiting their 10+2 result are also eligible to apply. However their selection will be subject to obtaining the requisite percentage of marks prescribed for the courses.

The routine for the Nagaland State Entrance Examination (NSEE) will be fixed by the Nagaland Board of School Education (NBSE) and notified through local dallies. No individual call letters will be issued.

Sd/-

(NungsangmenlaImchen)

Ex-Officio Director.

Issued by DIPR

FELICITATION

We, the Aliba Village Council would like to extend our appreciation to the Assam Rifles, Mokochung Unit, under the command of Colonel Raj Bishnoi.

Your assistance in digging the drainage at our village ground, and also clearing some of the obstacles along a roadside was very much needed and we are ever thankful for your willingness to help our community.

Yours sincerely,

SD/-

Chairman,

Aliba Village Council.

TENÜNGSANG AGÜTSÜR

Teküboklen agüja aliba züngsemtemi takok tajung ngutetba aser temaba jenjang ajangzüktetba atema Dibuia Planning & Development Board indang Dibuia Education Committee-i nüma tanga parnok nem tetushi aser tenüngsang agütsür.

- Shri. T. Sanny Pongener, Addl Director, Sericulture menden tongtetba.
- Dr. Elizabeth Walling, Asst Prof., NCTE, Kohima nung acting Principal menden tongtetba.
- Smti. Tianungla Longkumer, GHSS, Dibuia nung Head Mistress menden tongtetba.
- Smti. S. Lanusangla, ADEO, Mokochung menden tongtetba.
- Dr. Moatula Ao, W/O Limakumba Walling, International Institute of Population Sciences, Mumbai nungi Dimapur, Nagaland nung "Demand Supply Dynamism of Health Care Delivery Services" talisa Traditional Medicine nung ajemdaker Doctor of Philosophy jenjang ajangzüktetba.
- Er. Temshichang Jongko, JE, North East Frontier Railways menden tongtetba.
- Shri. Alongdi Longchar, Assistant Manager Divisional Officer Jorhat, United India Insurance Co. Ltd. menden ngutetba.
- Shri. Watilong Longkumer, ICAI University, Dimapur nungi Bachelor of Arts (Political Science) nung Gold Medal takok anguba.
- Shri. Lanusanen Pongen, Arunachal aser Coimbatore nung INRC Rally takok anguba.

Tarutsü nunga parnok wadang nung takok lidakjangni ta Committee-i sarasademtsür.

Sd/-

(BENDANGLILA)

Secretary

Sd/-

(IMSUMEREN)

Convenor

JANGPETKONG STUDENTS' CONFERENCE (JKTM)

OPEN PENALTY SHOOTOUT TOURNAMENT

DIMAPUR DISTRICT SPORTS COUNCIL (DDSC)

20th APRIL 2021 | 7:30 AM

PRIZE MONEY

Winner: Rs. 50,000/- 1st Runners-up : Rs. 30,000/-

Golden Glove - Gift Hamper

ENTRY FEE : Rs. 3,000

FORMS AVAILABLE AT :

GUPTA OPTICALS (Opp. Holy Cross School)

DISPO KING STORE (Sub Jail Petrol Pump)

MI PRINTERS (Nuton Bosti)

Or Contact :

8974195003

8259800949

Chaalbaaz In London nung Shraddha-i shilem agitsü

Mumbai, Rongchii/April 03, 2021 (Agencies): Nüknüratepba - comedy film 'Chaalbaaz In London' nung Shraddha Kapoor aniokogo. Iba film ya Pankaj Parashar-i direct asütsü. Pankaj-isa 1989 küm Sridevi indang classic film Chaalbaaz direct süogo.

Bhushan Kumar, Krishan Kumar na meyong T- Series aser director Ahmed Khan o Shaira Khan na indang Paper Doll Entertainment longjemmer

iba film yanglutsü.

Kapoor-i ashiba agi, industry nung ajemoker külen nungi, tang film ka nung shilem ana (double role) agitsü asoshi yongyaseter.

"Iba maparen ya khuret tuluka asütsü, saka Bhushan sir aser Ahmed sir napronglai iba role atema kü dak temulung lemtetba atema pelar. Pankaj sir, shibai küm aika pa sempet ajanga audience atsüa aruogo, pa den külemi inyaktsü mapang agi sempettsüba atema pelaseter aser tali angazüktsü asoshi iba ya maongka tuluka lir. Iba maparen takok ngua injaktettsü teimla tulu yur inyaktsü," ta arishi küm 34 tain Shraddha-i ashi.

Parashar, shibai 1985 TV series Karamchand direct süogo, pai ashiba agi, iba comedy nung shilem anaprongla takok ngua agitettsü Kapoor dak teimla lir.

9buba Inter Coy sports meet tembangogo



Dimapur, Rongchii/April 03, 2021 (TYO): Brehostibarnü (01.04.2021) 8th NAP, Dynamic Eight Battalion Naltoqa Zunheboto District indang 9th Inter Coy sports meet shibangba sentong den 36th raising day 2021 sentong agiogo. Iba meet shibangba sentong nung DC Zunheboto, Peter Lichamo tetushi tesemdanger ama aruagi aden, ta sangdong ajanga metetdaksü.

DC-i, saisapong nung dang masü saka lenla ajunga nung ajemalutsü indang tongtibangtem metetdaksü.

Iba amala saisapong sentong ajanga kati ka metetepa akümtsü aser shilem agir tsüngda tesendaktep tali akangshitsü asoshi ajak nem

sabang agütsür, ta pai shisem. Nübur tenzükba maparen tsütsü teti dang nendaka aser bendanga agüja inyaksü asoshi pai telok ayongzük.

Kasa sentong nung, Commandant 8th NAP aser organizing chairman, H Kuhovi Sema-i, 8th NAP, Dynamic Eight Battalion Naltoqa, koba battalion rongnung tejenba lir, iba battalion ya 1985 küm tenzük, ta ashi.

Iba Battalion tentetsü asoshi shilem agir mezünpur dang teti pelatsü aser tongtibangsa iba Battalion amenoktsü asoshi mulungsoa ali tenla agütsür kidanger yimtsüngtem bilemteta aser parnok danga pelatsüla, ta pai metetdaksü.

Iba asayamung shibangba sentong nung, 'buglers' ajanga

general salute agütsü. Unit school-i bamboo dance saya, unit nungi hadirtem amshiba (blind folded) sayu, women department nungi sobaliba tsüngsang sayu aser shilem agir team temi march pass sayua liasü. Kasa mapang, Deputy Commandant aser Organizing Secretary, Y Kumtsu Yim-i iba asayamung indang tongmelang agi telok dang metetdaksü.

Maneni, iba meet nung ADM Coy pur takoker telok ka ama jenjang ajangzükter aser tetushi tesemdangeri takok angur ajak nem takok marok den medal agütsü. Sentong temer sülen, telok chiyongba mapang agi, koba meet ayongertemi anepalua liasü, ta kasa sangdong nung shia lir.

Miami Open: Jannik o Hubert na final asayatsü

Miami, Rongchii/April 03, 2021 (Agencies): Miami Open tebur kija semi-final asaya nung, taoba mapang junior skiing champion Jannik Sinner-i Bautista koka final tongtetogo.

Hokolbarnü, Miami Open tebur kija final tongteter asayar tasen rongnung Italy nunger arishi küm 19 tain Jannik pezübuba kümogo. Taoba mapang, iba asayamung final tongteter asayar tasen rongnung Novak Djokovic,

Rafael Nadal aser Andre Agassi nunger alitsü.


"Final tongtetba ya tajung, saka teinyaksü ano anüngdaka lir," ta Sinner-i ashi.

Jannik Sinner, shibai arishi küm 13 alidang tennis melena skiing asayatsü shim, pai top-level ATP asayamung tasembuba nungang shilem agir alitsü. Final tongtettsü atema, Semi-final nung pai Spain nunger Roberto Bautista Agut madak 5-7 6-4 6-4 agi takok angu.

Iba asayamung tebur kija final nung Jannik-i Poland nunger seed 26 Hubert Hurkacz den asayatsü. Honibarnü, tebur kija semifinal asaya tanga ka nung Hubert-i 6-3 6-4 agi world no.4 Andrey Rublev tsükdakja mezüng ATP Masters 1000 final tongteter alitsü.

Djokovic, Nadal aser Roger Federer nungeri iba asayamung nung shilem magiba ajanga, semi final nung tokteptsü atema asayar pezü yagi maongka tajung angu.

Ronaldo indang'armband' dollar 75,000 agi ayok



New Delhi, Rongchii/April 03, 2021 (Agencies): Portugal nunger nüngtugu football star, Cristiano Ronaldo indang armband, koba auction atema agütsü, iba armband ya

company kati dollar 75,000 yong alizükogo.

Serbia nung ita trok kinü tanur ka surgery agitsü mechi senotsü teyari agütsü nükjidong nung charity telok kati iba armband auction süa liasü.

Taoba ita, World Cup qualifier asayamung nung Portugal aser Serbia na draw (2-2) asüba mapang, referee temi Ronaldo indang goal magizükba ajanga, tejashi nung pai iba armband indok.

Hokolbarnü, Serbia nunger Mozzart-i ashiba agi, Red Star indang Rajko Mitic stadium nung inyaker (fireman) kati shia aruba armband atema dinar million 7.5 agütsüogo.

"Meimchir nem teyari agütsü asoshi onoki iba armband auction nung ayoktsü lemtet," ta Mozzart-i ashi.

"Kinü tanur Gavriilo Djurdjevic nem teyari agütsütsü aser iba ama maparen nung longjemer inyaksü asoshi nüburtem dang osang sangoktsütsü nükjidong yur onoki iba armband auction asütsü sentong yanglua liasü," ta pai shisem.

Gavriilo Djurdjevic ya spinal atrophy tashidak agi kangshidar aser pa tetsü Nevena-i ashiba agi, tanü tashi nung pa surgery agitsü atema euro 500,000 (\$587,900) shi tenla aruogo.

Taoba Honibarnü, Portugal aser Serbia napronglai goal 2-2 idaktsür draw nung asaya atemtsü lia, Ronaldo-i idaktsüba goal ka magizükba ajanga asaya nungi tukadokba mapang pa teka nung inoker aliba armband agizüker indok.

Tashkent nung 2023 Men's Boxing World Championships ayongtsü

New Delhi, Rongchii/April 03, 2021 (Agencies): 2023 men's boxing World Championships asayamung ya Uzbekistan yimtiba Tashkent nung ayonga asayatsü, ta Hokolbarnü International Boxing Association (AIBA) sangdong ajanga metetdaksü.

AIBA President Umar Kremlev-i Uzbekistan semdangba mapang, Tashkent nung 2023 Men's Boxing World Championships ayongzüksü ta osang jangjatsü. "Boxer tajung adokba linük - Uzbekistan nung 2023 Championships ayongzüksü maongka anguba atema pelar. Iba asayamung takok ngua agitetsüsa, achayanger, fans teyari aser shilem agirtemi nungittsü ta amanger," ta Kremlev-i ashi.

AIBA-i ashiba agi, Boxing Federation of Uzbekistan ajanga bid süa liasü aser Board-i iba Federation pusema vote agütsü.

Kremlev-i Uzbekistan semdangba mapang, pai NOC Chairman, Rustam Shaabdurakhmonov aser Boxing Federation of Uzbekistan indang mezüng deputy chairman, Saken Polatov na den senden amen, kong Uzbekistan aser central Asia nung boxing wadang tsütsü terenlok lidaktsütsü aser World Championships atema renemshitsü dak sendakba nung mezüng mera agitsü indang sensaksema liasü.

Iba Championships ya 22buba asayamung aser Uzbekistan nung mezüng

ayonger alitsü.

"Linük nung temang atema teyari aliba saisapong ajungkettsütsü mapatong nung pusemba atema, President aser Sorkar naprongla dang pelaba metetdaksür. Uzbekistan ya International Boxing Association indang züngsem tajung ka lir," ta Shaabdurakhmonov-i ashi.

"Linük tenüng nungi athlete temi shilem tajung agia takok bener aruba atema onok nüma-atanger. Iba tesem nung aser alima ajungalen boxing asaya tali nüngtugu kümdaktsütsü atema AIBA den tesendaktep tali dang akangshitsü. Tashkent nung Coach, referees aser judge tem atema education centre yanglutsü sensaksemogo. Central Asia atema iba centre ya tongtibang tesem ka ama achayangtsü," ta pai shisem.

2016 küm Rio Olympic Games nung Uzbekistan-i gold medal asem takok angu.

"AIBA Men's World Boxing Championships ayongzüksü atema Uzbekistan shimba osang angazüka AIBA dang pelaba metetdaksür. Iba maongka ya konang tuluka aser khuret ama agizüker. Iba asayamung terpor junga ayongzüksü asoshi onoki tajungtiba inyaksü. Asenok ajaki iba asayamung takok ngua agitetsütsü imlaa atadi," ta Polatov-i ashi.

Maneni, AIBA Men's World Boxing Championships atema renemshiba maparen tenzükogo aser iba dak sendakba mezüng asalentong inyaka odor.

Phom Monyu Volleyball Trophy tembangogo



Dimapur, Rongchii/April 03, 2021 (TYO): Dimapur Phom Students Union ajanga ayongba 1st Phom Monyu Volleyball Trophy asayamung shibangba sentong Brehostibarnü DDSC stadium nung agiogo. Iba sentong nung EAC Jalukie, C. Wangan Phom tetushi tesemdanger ama aruagi denogo, ta sangdong ajanga metetdaksü.

Wangan-i, Phom nungeri sapuba asaya rongnung

Volleyball ya lir aser Dimapur nunga asayartemi kasa tejangraba tanela nung shilem agiba angudang pelar, ta ashi.

Iba asayamung nung team 15 agi shilem agiogo aser Yongshei Students Union-i 'Phom Monyu Volleyball Trophy' kokogo. Kasa mapang, Auching Students Union, Dimapur-i runners-up jenjang ajangzükter.

Sentong tembanga Games & Sports Secretary, P. Baulong Phom-i tepela anküp o jembu.

BILEMDANGANG

"Karaa angazüktsü merangang, saka mit adoktsü melungi süang."